

ZAKON O STUDENTSKOM ORGANIZIRANJU KANTONA SARAJEVO

I - Opće odredbe

Član 1. (Predmet Zakona)

Ovim Zakonom se uređuje osnivanje, položaj, djelatnost, organizacija i način finansiranja studentskih organizacija na visokoškolskim ustanovama u Federaciji Bosne i Hercegovine, studentski izbori, izbor i djelovanje studentskog pravobranioca, te druga pitanja vezana uz djelovanje studentskih organizacija.

Član 2. (Značenje izraza)

U smislu ovoga Zakona, izrazi imaju sljedeća značenja:

1. Student –lice upisano na akreditiranu i licenciranu visokoškolsku ustanovu, koje studiji pohađa redovno, vanredno na način utvrđen statutom visokoškolske ustanove.
2. Visokoškolska ustanova – ustanova koja se bavi djelatnošću visokog obrazovanja u skladu sa zakonom.
3. Studentski parlament - studentsko izborno predstavničko tijelo koje štiti interese studenata, sudjeluje u odlučivanju u organima visokoškolske ustanove i predstavlja studente u sistemu visokog obrazovanja.
4. Udruženje studenata – udruženje građana osnovano u skladu sa Zakonom o udruženjima i fondacijama Kantona, čije većinsko članstvo čine studenti i čija je djelatnost vezana uz zadovoljavanje studentskih potreba u oblasti visokog obrazovanja, nauke, kulture, sporta, zdravlja, ekologije i drugih područja od interesa za studente i koja je upisana u popisane evidencije.
5. Studentska organizacija – studentski parlament, studentska konferencija, udruženje studenata ili druga organizacija studenata, neovisno o obliku organiziranja, koja djeluje na visokoškolskoj ustanovi.
6. Studentski pravobranilac – član studentskog parlamenta ovlašten za zastupanje, praćenje i zaštitu prava studenata u okviru visokoškolske ustanove.

II – Načela studentskih organizacija

Član 3. (Načela)

Članstvo u studentskim organizacijama je dobrovoljno.

Studenti sudjeluju u upravljanju visokoškolskom ustanovom kroz studentski parlament kao izbornu predstavničko tijelo studenata visokoškolske ustanove.

Na visokoškolskim ustanovama slobodno djeluju udruženja studenata i druge studentske organizacije kojima je djelatnost unapređenje studija i zadovoljavanje studentskih potreba (stručna i naučna aktivnost, kultura, sport, studentski standard i drugo).

Zabranjena je svaka diskriminacija studenata po bilo kojoj osnovi u odnosu na pravo članstva i rada u studentskim organizacijama, zaštitu koju uživaju pred studentskim pravobraniocem, u pravu na sudjelovanje u izborima i pravu na djelovanje u studentskim parlamentima, kao i u odnosu na druga prava predviđena ovim Zakonom.

Sudjelovanje svakog od ciklusa u skladu sa okvirnim zakonom o visokom obrazovanju u BiH u studentskom parlamentu visokoškolske ustanove uređuje se statutom studentskog parlamenta, u skladu sa ovim Zakonom i općim aktima visokoškolske ustanove.

III – Obaveze visokoškolskih ustanova

Član 4. (Obaveze)

Visokoškolske ustanove su dužne studentskom parlamentu i studentskom pravobraniocu osigurati prostor za rad, sufinansirati njihovu djelatnost te im pružati administrativno-tehničku pomoć. Visokoškolske ustanove su dužne, u skladu sa svojim mogućnostima, podupirati rad drugih studentskih organizacija.

Organi visokoškolskih ustanova su dužni osigurati preduslove za zakonit rad studentskog parlamenta i drugih studentskih organizacija koje djeluju na visokoškolskoj ustanovi, te osigurati zakonito i pravodobno provođenje studentskih izbora i omogućiti svim studentima ravnopravno sudjelovanje u izborima.

Visokoškolska ustanova je dužna omogućiti studentskim organizacijama autonomno raspolaganje sredstvima za njihov rad koja se vode na računima visokoškolskih ustanova u skladu sa zakonom i općim aktom visokoškolske ustanove.

Obaveze visokoškolske ustanove iz prethodnih stavova ovog člana uređuju se općim aktom visokoškolske ustanove.

IV – Studentski parlament

Član 5. (Ustroj)

Studentski parlament se ustrojava i djeluje na način predviđen ovim Zakonom i općim aktima visokoškolske ustanove i studentskog parlamenta.

Studentski parlament se ustrojava na visokoškolskoj ustanovi i to kao studentski parlament univerziteta i studentski parlament visoke škole. Ukoliko visokoškolska ustanova u svom sastavu ima organizacione jedinice, na njima može djelovati studentski parlament organizacione jedinice.

Na nivou Kantona Sarajevo ustrojava se Studentski parlament Univerziteta u Sarajevu kao koordinaciono tijelo studentskih parlamenata visokoškolskih ustanova

V- Djelokrug rada studentskog parlamenta

Član 6. (Djelokrug)

Studentski parlament na visokoškolskoj ustanovi:

- bira studentske predstavnike u organe visokoškolskih ustanova,
- bira studentske predstavnike u odgovarajuće organizacije, ustanove i druga pravna lica kojima je osnivač visokoškolska ustanova,
- donosi plan i program rada studentskog parlamenta,
- imenuje studentskog pravobranioca,
- brine o kvalitetu života studenata, a posebno o kvaliteti studijskog procesa, studentskom standardu, ostvarivanju studentskih prava i drugim pitanjima od interesa za studente,
- predlaže nadležnim organima visokoškolskih ustanova plan finansiranja studentskih aktivnosti,
- potiče vannastavne aktivnosti studenata,
- potiče, ostvaruje i unapređuje saradnju sa studentskim organizacijama u Kantonu Sarajevo, Federaciji Bosne i Hercegovine, Bosni i Hercegovini, te na međunarodnom planu,
- imenuje
- donosi opće akte studentskog parlamenta, ako ovim Zakonom ili statutom studentskog parlamenta nije drugačije određeno,
- obavlja druge poslove od interesa za studente visokoškolske ustanove.

VI – Organi studentskog parlamenta

Član 7.

Studentski parlament ima predsjednika, koji predstavlja i zastupa studentski parlament, koordinira njegov rad i obavlja druge poslove predviđene općim aktima visokoškolske ustanove i studentskog parlamenta. Predsjednika studentskog parlamenta zamjenjuje njegov zamjenik. Mandat predsjednika i zamjenika traje jednu akademsku godinu i može se jednom ponoviti.

Studentski parlament može imati predsjedništvo i druge organe predviđene statutom studentskog parlamenta.

Mandat članova studentskog parlamenta traje dvije godine i može se jednom ponoviti.

Mandat člana prestaje prestankom statusa studenta, danom podnošenja ostavke, ako u posljednje dvije godine studija nije sakupio minimalno 60 ECTS bodova ili ako drugi put ponavlja godinu tokom studija u slučaju izvođenja studija koji je organiziran prema propisima koji su važili prije stupanja na snagu Okvirnog zakona o visokom obrazovanju u Bosni i Hercegovini, ako član zbog objektivnih okolnosti nije u stanju obavljati dužnost te u ostalim slučajevima predviđenima statutom studentskog parlamenta.

U slučaju prestanka mandata člana studentskog parlamenta prije isteka vremena na koje je izabran postupit će se u skladu sa članom 14. stav 4. ovog Zakona, a ako to nije moguće, provest će se izbori za novog člana studentskog parlamenta. Tako izabrani član ima mandat koji odgovara mandatu člana umjesto kojega je izabran.

VII – Statut studentskog parlamenta

Član 8.

Studentski parlament ima statut.

Statut donosi visokoškolska ustanova, na prijedlog studentskog parlamenta i na način predviđen njenim općim aktom, pri čemu za njega treba glasati većina od ukupnog broja studentskih predstavnika u senatu visokoškolske ustanove.

Statutom studentskog parlamenta propisuje se:

- način rada studentskog parlamenta,
- organi studentskog parlamenta,
- sastav, način izbora i nadležnost organa i drugih tijela studentskog parlamenta,
- način imenovanja studentskog pravobranioca,
- način izbora predstavnika studenata u organe visokoškolske ustanove, odnosno druge organe i organizacije,
- odgovornost organa i članova studentskog parlamenta za neispunjavanje propisanih obaveza, odnosno poslova vezanih uz rad studentskog parlamenta,
- način rada, ovlaštenja i odgovornosti studentskog pravobranioca,
- donošenje i usvajanje izvještaja o radu, odnosno finansijskog izvještaja,
- ostala pitanja važna za rad studentskog parlamenta.

VIII – Studentski parlament Univerziteta u Sarajevu

Član 9. (Pojam, djelokrug)

Studentski parlament UNSA je koordinaciono tijelo koje usklađuje rad svih studentskih parlamenata visokoškolskih ustanova u Kantonu Sarajevo na zajedničkim programima, raspravlja o pitanjima od zajedničkog interesa za studente te rukovodi aktivnostima u međunarodnoj saradnji.

Kao koordinaciono tijelo studentskih parlamenata visokoškolskih ustanova u, Studentski parlament UNSA posebno:

- usklađuje rad studentskih parlamenata visokoškolskih ustanova
- prati i afirmira interese studenata na nivou Kantona Sarajevo
- prati provođenje propisa o studentima,
- saraduje sa nadležnim ministarstvima za visoko obrazovanje u pripremi propisa koji se odnose na studente,
- brine o uslovima u kojima djeluju studentski parlamenti na visokoškolskim ustanovama,
- obavlja druge poslove od interesa za studente na nivou Kantona Sarajevo
 - imenuje predstavnike studenata u organima i drugim tijelima domaćih i međunarodnih studentskih organizacija i drugih organizacija u kojima sudjeluju predstavnici studenata sa područja Kantona Sarajevo
 - imenuje predstavnike studenata u Senat Univerziteta u Sarajevu

Studentski parlament UNSA donosi opće akte Studentskog parlamenta i poslovnik o svom radu. Poslovnik o radu Studentskog parlamenta UNSA stupa na snagu kada ga potvrdi većina studentskih parlamenata visokoškolskih ustanova.

Studentski parlament UNSA ima svog predsjednika, zamjenika predsjednika, druge organe i tijela Studentskog parlamenta, u skladu sa općim aktima Studentskog parlamenta.

- Studentski parlament UNSA se saziva na zahtjev najmanje 1/3 studentskih parlamenata koji je čine.

IX – Sastav studentskog parlamenta

Član 10.

Studentski parlament visokoškolske ustanove čine studenti visokoškolske ustanove koje studenti biraju na izborima između kandidata navedenih na izbornoj listi.

Na izborima za studentski parlament bira se najmanje onoliko članova studentskog parlamenta koliko u senatu univerziteta, odnosno visoke škole ima studentskih predstavnika.

U slučaju kada visokoškolska ustanova ima organizacione jedinice u svom sastavu, članovi studentskog parlamenta te visokoškolske ustanove obavezno su i predstavnici studentskog parlamenta svake organizacione jedinice, ukoliko su isti formirani.

U slučaju iz stava 3. ovoga člana, ukupan broj predstavnika studentskih parlamenata organizacionih jedinica u sastavu visokoškolske ustanove ne može biti veći od dvije trećine ukupnog broja članova studentskog parlamenta visokoškolske ustanove.

Studentski parlament UNSA čine po dva predstavnika svakog studentskog parlamenta visokoškolske ustanove na nivou Kantona Sarajevo.

X – Sjedište i način rada studentskog parlamenta

Član 11. (Sjedište)

Studentski parlament visokoškolske ustanove ima sjedište u mjestu u kojemu je sjedište visokoškolske ustanove.

Studentski parlament UNSA ima sjedište u kampusu Univerziteta u Sarajevu.

Član 12. (Način rada)

Studentski parlament radi na sjednicama koje saziva predsjednik ili drugi statutom ovlašteni organ najmanje jednom u mjesec dana, osim u toku mjeseca augusta.. Predsjednik je dužan sazvati sjednicu studentskog parlamenta na pisani zahtjev jedne četvrtine članova studentskog parlamenta. Takav zahtjev sadrži i prijedlog dnevnog reda. Ako predsjednik ne sazove sjednicu u roku od 8 dana od dana podnošenja zahtjeva, predlagači mogu sami sazvati sjednicu.

Studentski parlament može pravovaljano odlučivati ako je na sjednici prisutna natpolovična većina članova. Odluke se donose većinom glasova prisutnih članova, ako statutom nije propisano drugačije. O radu sjednice vodi se zapisnik koji najmanje sadrži: popis prisutnih, dnevni red, zaključke po svakoj tački dnevnog reda te potpis zapisničara i predsjedavajućeg.

XI – Studentska udruženja i druge organizacije studenata

Član 13. (Status)

Na visokoškolskim ustanovama mogu djelovati udruženja studenata osnovana u skladu sa Zakonom o udruženjima i fondacijama Federacije BiH i druge organizacije studenata nastale udruživanjem studenata u okviru visokoškolske ustanove.

Status udruženja studenata ili druge organizacije studenata stiće se upisom u evidenciju studentskih organizacija pri Ministarstvu obrazovanja i nauke Federacije Bosne i Hercegovine (u daljnjem tekstu: Ministarstvo) rješenjem Ministra obrazovanja i

nauke Federacije Bosne i Hercegovine (u daljnjem tekstu: Ministar), kojim se potvrđuje da udruženje ili organizacija udovoljava uslovima iz člana 2. ovoga Zakona. Ministarstvo će jednom godišnje provjeravati status udruženja studenata ili druge organizacije studenata. Ako udruženje ili organizacija prestane udovoljavati uslovima iz ovoga člana, ministarstvo će rješenjem ukinuti status udruženja studenata ili druge organizacije studenata. Protiv rješenja kojim se status udruženja studenata ili druge organizacije studenata priznaje, odbija ili ukida dopuštena je žalba Vladi Federacije čija je odluka konačna.

Način vođenja evidencije iz stava 2. ovog člana, propisat će Ministar.

Član 14 (Djelovanje)

Udruženja studenata i druge organizacije studenata slobodno djeluju na visokoškolskoj ustanovi. Visokoškolska ustanova, u skladu sa mogućnostima, osigurava prostorne i materijalne uslove za rad udruženja studenata i druge organizacije studenata.

Djelovanje studentskih organizacija na visokoškolskoj ustanovi može se detaljnije urediti općim aktom visokoškolske ustanove.

XII – Finansiranje rada studentskog parlamenta, udruženja studenata i drugih studentskih organizacija

Član 15.

Rad studentskog parlamenta finansira se iz budžeta visokoškolske ustanove na kojem studentski parlament djeluje.

Rad udruženja studenata i drugih organizacija studenata može se finansirati:

- iz budžeta kantona, visokoškolskih ustanova,
- od zaklada, fondacija i darovnica,
- od udjela u prihodu pravnih lica koja posreduju pri studentskom zapošljavanju, u skladu sa općim aktom ili odlukom nadležnog organa tog pravnog lica,
 - iz drugih izvora ako su u skladu sa zadaćama studentske organizacije te ako to nije u suprotnosti sa zakonom ili statutom visokoškolske ustanove.

Član 16. (Način finansiranja)

Studentski parlament visokoškolske ustanove dužan je raspisati javni konkurs za finansiranje studentskih programa koje provode studentske organizacije ili pojedini studenti. Studentski parlament koji je raspisao javni konkurs ne može na konkurs prijaviti svoj studentski program.

Studentski parlament visokoškolske ustanove dužan je osnovati komisiju za provođenje konkursa. Većinu članova komisije čine studenti imenovani od strane studentskog parlamenta, a ostatak članova nastavno osoblje imenovano od strane visokoškolske ustanove. Član komisije ne može biti student pojedinac ili osoba koja je

član studentske organizacije koja je prijavila program na konkurs. Broj članova komisije i način njihovog izbora određuje se općim aktom visokoškolske ustanove.

Komisija iz stava 4. ovog člana podnosi prijedloge raspodjele finansijskih sredstava. Odluku o raspodjeli finansijskih sredstava donosi visokoškolska ustanova na prijedlog studentskog parlamenta.

Član 17. (Sredstva)

Budžetski fondovi, kriteriji za konkurse te način vrednovanja studentskih programa koje provode studentske organizacije ili pojedini studenti, osim studentskih parlamenata, propisuju se općim aktom, kojeg predlaže studentski parlament, natpolovičnom većinom svih članova, a donosi senat univerziteta odnosno visoke škole.

Troškovi međunarodne suradnje i poslovanja Studentskog parlamenta UNSA finansiraju se iz proračuna visokoškolske ustanove pri kojoj je sjedište Studentskog parlamenta UNSA

Kantonalno ministarstvo obrazovanja i nauke participira u finansiranju rada Studentskog parlamenta UNSA sa jednom polovinom potrebnih sredstava na godišnjem nivou.

Studentski parlament i druge studentske organizacije bez pravnog subjektiviteta raspolažu sredstvima za svoj rad u okviru računa visokoškolske ustanove, u skladu sa zakonom i općim aktom visokoškolske ustanove.

Udruženja studenata raspolažu sredstvima na način utvrđen njihovim statutom.

XIII – Nadzor nad obavljanjem djelatnosti studentskih organizacija

Član 18.

Studentske organizacije su nezavisne u svom djelovanju u skladu sa ovim Zakonom, Rad studentskih organizacija je javan.

Nadzor nad obavljanjem djelatnosti studentskih organizacija obavlja visokoškolska ustanova, u skladu sa svojim općim aktom.

Visokoškolske ustanove nadziru namjensko trošenje novčanih sredstava koja dodjeljuju studentskim organizacijama, u skladu sa svojim općim aktom.

XIV – Biračko pravo

Član 19.

U izborima za studentski parlament visokoškolske ustanove imaju pravo sudjelovati svi studenti, u skladu sa ovim Zakonom, općim aktu visokoškolske ustanove i općim aktom studentskog parlamenta.

Svi studenti u Kantonu Sarajevo imaju pravo birati i biti birani za studentske predstavnike (članove i zamjenike) u studentskom parlamentu.

Za studentskog predstavnika ne može se kandidirati student koji u posljednje dvije godine studija nije sakupio minimalno 60 ECTS bodova ili koji drugi put ponavlja godinu tijekom studija koji se izvodi prema propisima koji su vrijedili prije stupanja na snagu Okvirnog zakona o visokom obrazovanju u Bosni i Hercegovini te u ostalim slučajevima predviđenim statutom studentskog parlamenta.

Ako studentu koji je izabran za studentskog predstavnika prestane mandat prije isteka vremena na koje je izabran, zamjenjuje ga njegov zamjenik ili kandidat za studentskog predstavnika koji je sljedeći na izbornoj listi s koje je student izabran.

XV - Izbori

Član 20.

Izbori za studentske parlamente visokoškolskih ustanove (članove i zamjenike) održavaju se u pravilu u mjesecu martu svake druge akademske godine.

Izbore raspisuje rukovodilac visokoškolske ustanove najmanje 30 dana prije njihova održavanja te imenuje izbornu komisiju koja provodi izbore.

Kandidature se podnose izornoj komisiji najkasnije 10 dana prije održavanja izbora, a objavljuju se najmanje 8 dana prije provođenja izbora.

Izborna komisija ima 5 članova. Tri člana komisije i njihove zamjenike predlaže studentski parlament, a dva člana komisije i njihove zamjenike predlaže senat visokoškolske ustanove iz reda nastavnog osoblja. Izbornu komisiju imenuje rukovodilac visokoškolske ustanove. Izborna komisija imenuje biračke odbore i utvrđuje spisak birača.

Članovi komisije za prigovore i članovi biračkih odbora, kandidati na izborima i članovi studentskog parlamenta s važećim mandatom ne mogu biti istodobno i članovi izborne komisije.

Posebnim općim aktom studentskog parlamenta propisuje se izborni postupak, a posebno:

- način predlaganja i utvrđivanja kandidata,
- način provođenja izbora,
- vođenje biračkog spiska,
- uvjeti za pravovaljanost kandidatura,
- mjesto i vrijeme izbora,
- trajanje glasanja koje ne može biti kraće od 12 sati,
- tajnost glasanja,
- način provjere identiteta kandidata, birača i drugih osoba koje sudjeluju u izbornom postupku,
- sudjelovanje posmatrača,
- način postupanja za slučaj jednakog broja glasova pojedinih kandidata,
- prigovor na tok i rezultate izbornog postupka,
- sastav i djelokrug komisije za prigovore.

Član 21.

Prigovori na tok i rezultate izbornog postupka podnose se komisiji za prigovore na nivou visokoškolske ustanove.

Komisija za prigovore ima pet članova. Dva člana komisije i njihove zamjenike iz reda studenata predlaže studentski parlament, a imenuje rukovodilac visokoškolske ustanove. Tri člana komisije i njihove zamjenike iz reda nastavnog osoblja predlaže senat visokoškolske ustanove, a imenuje rukovodilac visokoškolske ustanove.

Članovi Izborne komisije i biračkih odbora, kandidati na izborima i članovi studentskog parlamenta s važećim mandatom ne mogu biti istodobno i članovi komisije za prigovore.

XVI – Studentski pravobranilac

Član 22.

(Pojam, djelokrug)

Visokoškolska ustanova ima studentskog pravobranioca kojeg imenuje studentski parlament na vrijeme od jedne godine, u skladu sa općim aktom studentskog parlamenta. Mandat studentskog pravobranioca može se jednom ponoviti.

Rad pravobranioca finansira se iz budžeta visokoškolske ustanove.

Studentski pravobranilac:

- prima prigovore studenata koje se odnose na njihova prava i raspravlja o njima s nadležnim organima visokoškolske ustanove,
- savjetuje studente o načinu ostvarivanja njihovih prava,
- može sudjelovati u disciplinskim postupcima protiv studenata radi zaštite njihovih prava,
- obavlja druge poslove utvrđene općim aktom visokoškolske ustanove.

XVII - Disciplinska odgovornost rukovodilaca visokoškolskih ustanova

Član 23.

Za kršenje odredbi ovog Zakona rukovodilac visokoškolske ustanove podliježe disciplinskoj odgovornosti u skladu sa općim aktom visokoškolske ustanove.

XVIII – Prelazne i završne odredbe

Član 24.

Studentske organizacije izabrane u skladu sa propisima koji su važili do dana stupanja na snagu ovog Zakona nastavljaju s radom do izbora studentskih parlamenata prema ovom Zakonu.

Studentski predstavnici u senatu visokoškolskih ustanova nastavljaju svoj rad do izbora studentskih predstavnika prema ovom Zakonu.

Udruženja studenata i druge studentske organizacije osnovane prema propisima koji su važili na dan stupanja na snagu ovoga Zakona nastavljaju svoj rad. Svoje opće akte i organizaciju dužne su uskladiti s ovim Zakonom u roku od 90 dana od stupanja na snagu ovoga Zakona.

Visokoškolske ustanove su dužne uskladiti svoje opće akte s ovim Zakonom te donijeti opće akte iz člana 4. stava 4., člana 4. stava 6., člana 15. stava 2. i člana 16. stava 1. ovoga Zakona u roku od 90 dana od dana stupanja na snagu ovoga Zakona.

Visokoškolske ustanove donijet će opće akte kojima će propisati izborni postupak za provođenje prvih izbora za studentske parlamente, u skladu sa ovim Zakonom, u roku od 90 dana od stupanja na snagu ovoga Zakona. Prvi izbori za studentske parlamente u skladu sa ovim Zakonom provest će se u roku od 120 dana od dana stupanja na snagu ovoga Zakona, a mandat tako izabranih članova trajat će do izbora članova studentskih parlamenata u skladu sa članom 19. stav 1. ovoga Zakona.

Konstituirajuću sjednicu studentskog parlamenta izabranog u skladu sa ovim Zakonom, na kojoj će se izabrati predsjednik studentskog parlamenta te formirati komisija za izradu prijedloga statuta studentskog parlamenta, saziva rukovodilac visokoškolske ustanove u roku od petnaest dana od dana proglašenja pravovaljanih studentskih izbora.

Ministar će donijeti opći akt, kojim će se propisati način vođenja evidencije iz člana 12 stav 2 u roku od 90 dana od dana stupanja na snagu ovog Zakona.

Član 25.

Na pitanja koja nisu uređena ovim Zakonom primjenjivat će se odredbe Okvirnog zakona o visokom obrazovanju u Bosni i Hercegovini, kantonalnih zakona i drugih propisa o visokom obrazovanju.

Član 26.

Danom stupanja na snagu ovog Zakona prestaju da važe propisi o studentskom organiziranju koji su se primjenjivali na području Federacije Bosne i Hercegovine.

Član 27.

Ovaj Zakon stupa na snagu osmog dana od dana objave u „Sluzbenim novinama Kantona Sarajevo“